



Les Israélites sont comme esclaves afferuis en Egypte de charges insupportables.

EN faueur de Ioseph, qui comme Vice-Roy gouuernoit le pays d'Egypte, le Patriarche Iacob son pere, surnommé Israël, & tous les enfans descendent vers les Egyptiens, pour éuiter la famine, qui estoit lors en leur pays, & estoient lors soixante & dix personnes sorties de ses reins, qui multiplierent enfin en douze grandes lignées, les noms desquelles sont Ruben, Simeon, Leui, Iuda, Issachar, Zabulon, Ioseph, Benjamin, Dan, Nephtali, Gad, & Aser. Or Ioseph estant mort, & tous ses freres, les enfans issus d'eux multiplierent, & deuinrent puissans, & remplirent la terre où ils habitoient. Lors s'esleua vn nouveau Roy, qui n'auoit conneu Ioseph, ny les loyaux seruices qu'il auoit faits au Royaume. Or ce Roy dit au peuple, le voy ces Hebreux Israélites estre plus puissans que nous; parquoy est besoin d'y aduiser sagement, afin qu'ils ne multiplient dauantage; car si quelque ennemy nous vouloit faire guerre, il se pourroit ioindre avec eux. Le Roy donc constitua sur eux des maistres des œuures, pour les affliger & tourmenter par toutes charges, leur faisant faire mortier, briques & ouurages de terre, & des edifices & tabernacles; ils estoient tyrannisez & mocquez sans intermission, mais tant plus ils estoient trauaillez de charges insupportables, tant plus augmentoient & prosperoient en heureuse famille & biens.